



## **La munnizza**

**Si putissiru li nostri muerti / vidìri tuttu chiddru ca ni succedi  
la cruci facissiru cu manu manca / e forsi anchi cu li du piedi  
cu naschi attuppati girati ddra banna / maniàvamu la munnizza  
mentri oi l'assicutanu tutti / picchè è fonti di granni ricchezza.**

**ConSORZI, Impresi fannu la cursa / pi aggiudicarsi gari e apparti  
lu populu paga bulletti salati / ma resta lu fietu di cani muerti  
di ccà lu cartuni, ddrà li buttigli / poi socchi arristà di lu mangiari  
tuttu finisci ni lu munnizzaru / scecchi nuantri ca iammu a pagari.**

**Sempri cchiù spissu ni capita anchi / ca nun si sapi unni ittari  
ncapu li treni allura la mintinu / di ccà e ddrà la fannu viaggiari.  
Strittanza ci fu tra mafia e pulitica / cu la camorra e la malavita  
mentri la genti comu sempri succedi / resta neulata, futtuta e raduta.**

**Ni l'Imalaia, munnu spirdutu / unni arrivaru quattu cristiani  
ci truevi plastica, lattini di birra / e nzina li scorci di li banani  
ni tuttu lu mari na vota pulitu / ci su li pisci ca vannu a benzina  
sta terra è ridutta a na fitinzia / puzza ormai peggju di na latrina.**

**Caniattì Frivaru 2008**

**Indice poesie: <http://www.solfano.it/treppiedi/index.html>**

**Pagina principale: <http://www.solfano.it>**